

Tanggungjawab Muslim

Daripada Abu Musa al-Asyaari RA bahawa Nabi SAW bersabda:

عُودُوا الْمَرِيضَ، وَأَطْعِمُوا الْجَائِعَ، وَفُكُّوا الْعَانِيَ.

Maksudnya: “Ziarahlah pesakit, berilah makan orang yang lapar dan bebaskanlah tawanan.”

Riwayat al-Bukhari (10/117)

Pedoman dan Iktibar Hadis

Antaranya:

1. Hadis ini menunjukkan salah satu tanggungjawab Muslim terhadap saudaranya dengan menziarahi apabila dia berada di dalam keadaan keuzuran. Ini kerana nampak kesetiaan serta kejujuran dalam persahabatan di samping tanda bersimpati kepada sahabatnya.
2. Hadis di atas mengemukakan tiga suruhan kepada umat Islam sebagai sifat *ta'awun* dan *takaful* sesama mereka. Satu tanggungjawab kemanusiaan bahkan ke-Islaman itu sendiri hendaklah dijunjung supaya kehidupan masyarakat menjadi utuh dan padu. Antara anjuran tersebut ialah memberi makan kepada mereka yang memerlukannya, menziarahi pesakit dan membebaskan mereka yang dalam tawanan. Bantuan seperti ini sudah pasti diterima kasih oleh penerimanya dan budi tersebut akan dibawa dalam kamus kehidupannya sebagai sumbangan yang tidak ternilai.
3. Sikap dan sifat seperti ini sewajarnya dipupuk dalam masyarakat kerana ia menatijahkan masyarakat penyayang yang sudah tentu menguatkan lagi hubungan jaringan persahabatan. Akhirnya, kesatuan dan kekuatan ummah

dapat dibentuk di bawah payung ukhuwah Islamiyah.

4. Sungguhpun begitu, amat wajar bagi penziarah pesakit menziarahinya dengan mengikut adab dan etika supaya ia memberi manfaat kepada kedua belah pihak. Antaranya ialah:
 - Memberitahu terlebih dahulu sebelum datang ziarah.
 - Mendoakan kesihatan pesakit.
 - Membawa hadiah atau makanan yang disukai mengikut kemunasabahan.
 - Tidak terlalu lama dengan pesakit.
 - Tidak banyak mengajak berbual apatah lagi ketika dalam kronik.
 - Mengajar atau talkin dengan kalimah لا إله إلا الله sekiranya dalam keadaan sakaratul maut.
 - Menasihati pesakit supaya bersabar dan menyebut kelebihan atau fadhilat mereka yang bersabar ketika dalam sakit atau uzur.
5. Ada lagi beberapa adab yang perlu dipatuhi seperti menutup aurat dan perlahan suara supaya tidak mengganggu pesakit-pesakit lain.
6. Alangkah indahnya sekiranya dibawa bersama buku-buku ilmiah berkaitan agama untuk difahami oleh pesakit khususnya membabitkan amalan yang mesti dilakukan seperti berwuduk, tayamum dan solat dalam keadaan uzur. Ini kerana boleh menjadikan pesakit sentiasa prihatin dan bertanggungjawab berkenaan dengan ibadat kepada Allah.
7. Semoga kita menjadi golongan yang suka menziarahi pesakit kerana menunaikan hak saudara seIslam kita berdasarkan nas Nabi SAW.

Mutiara Hikmah

- ❖ **Sahabat yang paling baik** adalah orang yang sangat anda percaya dan membuat diri anda tenang bersamanya. Menjadi tempat berkongsi kelelahan, kesedihan dan tidak pernah menjual rahsia diri anda.
- ❖ **Pujangga berkata:** Hidup ini sangat singkat, maka jangan anda pendekkan dengan banyak merasa takut. Mencari kawan itu susah, maka jangan membuatnya menyesal dengan menghinanya. Sedangkan musuh itu banyak sekali, dan jangan menambah jumlah mereka dengan akhlak yang buruk.

Kisah Teladan

Para ulama, para ahli sirah dan para ahli biografi menyebutkan tentang sejarah hidup Urwah bin Zubair R.Anhuma, anak dari seorang pembela setia Rasulullah SAW yang merupakan periwayat yang paling besar dalam kitab-kitab hadis dari Aisyah R.Anha. Mereka menyebutkan bahawa Urwah mengkhatamkan Al-Quran selama empat hari.

Di dalam biografinya, para ulama mengatakan bahawa Allah hendak mengangkat darjatnya di sisi-Nya, lalu dia menimpakan ujian kepadanya, di mana di tengah perjalanan menuju ke negeri Syam, dia terkena penyakit gatal-gatal di kakinya, maka berkumpullah para tabib untuk mengubatnya, mereka mengatakan: “*Kami akan memotong kakimu dari telapak kaki.*” Dia berkata: “*Saya akan bersabar dan tidak ingin di potong.*” Akhirnya, penyakitnya itu menyerang hingga ke pehanya. Mereka berkata: “*Kamu tidak mempunyai jalan keluar, selain memotong kakimu, kalau tidak kamu akan meninggal dunia.*” Dia berkata: “*Allahlah tempat kita meminta pertolongan, sesungguhnya kita milik Allah dan kita akan dikembalikan kepada-Nya.*”

Para Tabib berkata: “*Kami tidak akan memotongnya sehingga kami memberi dahulu kamu minum dengan secangkir arak.*” Dia berkata: “*Maha suci Allah, saya tidak akan menghilangkan akal yang telah diberikan Allah kepadaku. Demi*

Allah sekali-kali tidak! Tetapi sekiranya saya berwuduk dan melaksanakan solat, kemudian potonglah pehaku.”

Lalu beliau pun berwuduk, menghadap kiblat dan melaksanakan solat dan di dalam solat dia bermunajat kepada Allah SWT, dia membaca ayat-ayat al-Quran yang jelas dengan sepenuh jiwanya. Lalu para Tabib mendatanginya dengan membawa gergaji, lalu mereka memotong kakinya. Tatkala darah mengalir dengan banyak sekali, beliau terus jatuh pingsan dan tidak sedarkan diri. Setelah beberapa jam kemudian, dia pun sedar. Lalu mereka berkata: *“Semoga Allah memperbaiki kesabaranmu atas pemergian anakmu yang mati dipijak oleh tunggangan Khalifah.”*

Maha Suci Allah! Pada saat sulit yang dihadapinya itu anaknya pulak dipijak oleh binatang peliharaan milik Khalifah hingga meninggal dunia. Lihatlah kelembutan Allah dan hikmah-Nya dalam menetapkan takdir-Nya.

Urwah bin al-Zubair berkata: *“Segala puji bagi Allah SWT sesungguhnya kita milik Allah dan hanya kepada-Nya kita akan kembali. Ya Allah, bagi-Mu segala puji jika Engkau mengambil sesungguhnya Engkau telah memberikan, Jika Engkau menguji sesungguhnya Engkau telah memberi kesihatan, Engkau telah memberi empat anggota badan kepadaku, Engkau mengambil satu anggota badan sahaja, bagi-Mu segala puji dan kepada-Mu aku bersyukur.”* Selanjutnya beliau berkata:

“Demi hidup-Mu Engkau tidak menghulurkan tanganku kepada perbuatan yang masih meragukan, Engkau tidak mendorong kakiku kepada perbuatan yang keji, fikiran dan pandanganku tidak menuntunku kepada hal itu dan fikiran dan akal kujuga tidak mendorong kepadanya. Ketahuilah, aku tidak pernah mendapatkan musibah dari Allah melainkan seorang pemuda sebelumku juga mengalami hal yang sama.”

Beliau pun pulang hanya mengharapkan pahala dari Allah SWT semata-mata, kerana Dialah yang telah menentukan dan memberikan ujian.